

女校女生

文：_____ / 卡通鴨
排：oi
圖：gogole

每逢Ocamp，除咗報Status之外，仲有乜好講呢？咁都係講下中學生活嘍。講起中學讀女校，個個都好好奇，女校好多是非嘍？女校識唔識到仔嘍？女校的女係咪特別純嘍？去幾多次Ocamp，就答幾多次。為咗滿足各位嘅好奇心，小編就嘍到分享下自身經歷同體會啦。

那些年，我們造過的男神

咦？乜女校有男神嘍咩？咪咁天真啦！所謂嘅男神好多時都只係一啲年過30、開始有脫髮危機嘅男人咋！男人喺女校係低等嘅動物，喺無競爭嘅環境下就會俾人吹捧成男神嘍。

但你以為男神咁易做咩？只要做咗男神，就會俾人瘋狂改圖取笑。今期HIT《太陽的後裔》？咁你就會俾人P到宋仲基咁樣。記得小編上電腦堂嗰陣，曾經見過有人將班相啲人全部P晒做男班主任個樣，嗰種震撼到依家都仲記得。女校入面有好多癲女人同腐女，一個個BL故事就咁流傳落嚟。其中一個故事，就係已婚嘅男老師A同老死男老師B嘅不倫之戀，A結婚只係掩飾同B嘅戀情。當然以上老土劇情純粹腐女創作，但幾乎每一個學生都聽過呢個故事。

可以得到全校女仔嘅「愛戴」好似係好幸福嘅事，其實只係表面吹捧，實則就恥笑。

小編記得某位男老師啱啱入嚟嗰陣，上台講句嘢都驚到手震腳震，仲要走埋音，最後當然又俾人笑足十世啦！

講到女校咁恐怖，難道男老師就注定一世成為女生們欺負嘅對象？其實喺女校做男老師都有幸福嘅一面嘍。

只要二十幾歲、個樣正正常常，喺一眾女生眼中都已經算幾可口。其中一個長期被選為男神嘅老師，實質外貌唔算出眾，但剪咗個韓仔頭，打扮抄足韓仔，又算係高大，就已經迷到一眾女生。每逢小息午膳放學都有班女兵圍住佢問功課，可能你會話：你唔抵得人地勤力啊？小編笑住搖頭，平時又唔見佢地問其他老師功課。男神老師亦會自稱男神，成日PO IG話要派軍糧。呢個時候，饑渴嘅兵仔們都紛紛留言話要接軍糧。

你話做女校男生幾幸福呢，可以一嘗以前從來無試過被女生包圍嘅感覺。第時想做老師嘅毒J們，識做啦！

女校多TB？

TB係咪特別多？呢個問題都幾熱門。小編有讀過其他中學，其實唔係好比較到，每班起碼一兩個咁啦，多咪3、4個囉，咁算唔算多呢？不過，可以一提嘅係，多數女仔都係喺F1升F2嗰陣忽然剪咗極短髮。

點解會咁呢？小編曾經分析過：有啲女仔細個已經好男仔頭，好想剪短髮，但屋企唔俾，升咗中二先反抗；有啲女仔可能係俾人影響，高form嘅TB好多時運動好，又係社幹事，F1仔做啦啦隊嗰陣，好多人都會仰慕佢地。傾慕者日日企喺走廊到睇高From練波，俾波掙到仲可以FF一番。外貌出眾嘅TB仲會吸引到粉絲，TB可以話係另類男神。而剪咗個短髮，辨識度都會高啲，可能因為型，所以令人想改變咁。

戀愛？食得嘍？

好多人都話讀過女校嘅女仔都特別容易出Pool，因為佢地特別溫柔，而且純過蒸餾水。雖然小編都希望呢個係事實，但望下自己再望下身邊嘅朋友，就知傳說永遠都只係一個傳說……當人地仲祝緊大家唔好A住Grad嘅時候，小編得到嘅祝福已經係負住Grad或者草錢買定姑婆屋。唉！但其實入到LU又咪係另一個女校，小編已經覺得自己係零。

至於女校係咪特別多同性戀呢？呢個問題都幾敏感。或者咁講啦，其實同男女校一樣，有啲人一開始就好肯定自己嘅性取向，亦有啲人會感到疑惑。而喺女校特別嘅環境之下，感到疑惑嘅人都幾多。校友兼老師都講過最早結婚嘅反而係TB，有啲人以為自己係同性戀，但畢咗業先發覺自己係雙性戀，反之亦然，愛情世界好難講嘍。

情情塔塔嘅嘢係咪少啲？咁又未必嘍。中學嗰陣識唔識到仔仔，其實都係睇人嘅啫，要識點都識到咁。補習社、做義工都有可能識到，不過俾人



知道識咗男友就好大機會俾人瘋狂討論，甚至 Grad 咗之後識都仍然會被討論，因為有拍拖嘅確唔多……而校內嘅愛情關係呢？又唔好睇到咁特別，男女校有嘅，女校都有可能。不過小編問過其他人，發現大部分女仔喺在學期間都曾經鍾意過其他女仔，呢樣可能男女校比較少啫。

Grad 咗之後又有個問題，戀愛為何物？好多人都好似前世無接觸過男仔咁，完全唔識點同仔仔相處。究竟我可唔可以 SD 呢個 Emoji 俾佢呢？如果「佢」成日搵我，係咪有啲咩？究竟我同男仔可以做啲咩？又唔可以做啲咩？曖昧究竟係點？我同佢算唔算曖昧梗？一條又一條兩性相處嘅問題，就係小編同 FD 子們成日喺到討論嘅煩惱。呢啲兩性關係嘅問題，其他人一早經歷過，唯有話輸在起跑線上。仔仔俾我地嘅感覺就係這麼遠，那麼近。

一班癲女人

女校嘅人俾人嘅感覺係好文靜好純，當然有啲女仔真係咁，但更多嘅女仔係有瘋狂同癲嘅一面。正所謂三個女仔一個圈嘛，一班最少都有 30 人啦，姐係每班 10 個圈，而每級有 5 班，即係……即係……全校夾埋都應該有二百幾三百個圈嘅。喺咁多個女仔嘅環境下，小編話女校嘅女仔唔癲都無人信啦。喺中二嘅時候就記得有班女仔喺課室大跳 Sorry Sorry，仲要錄埋擺上 YOUTUBE，尺度大到最後俾訓導主任警告，要刪咗條片佢。亦都有人試過用張紙包住條芝士腸當粉筆整估數學老師，攞到個老師寫到成個黑板都係水。當然有啲誇張到上晒高登，呢啲就留返你地自己慢慢發掘啦！

話雖如此，小編都無後悔過入女校，喺女校你可以做返自己，大聲談論女生話題。

「你今日著咩色打底？」

「有無人有 XX CM 嘅 M 巾，唔夠長我唔要㗎！」

喺女校，你會成日俾後面嗰個彈 BRA 帶，你會成日俾人掀裙，你會突然見到有人除褲。啊，係打底褲先啫！喺落雨嘅時候，你會發現喺無人坐嘅椅上會多咗幾對風乾梗嘅臭襪；喺夏天嘅時候，你會發現有幾個人著住 DEEP V 上堂，不過個 V 移咗喺後面啫，個個都拉開嚙晒啲拉鍊散熱；喺冬天嘅時候，個個唔係拖手就係擺隻手去隔離嗰個人嘅衫袋到，成個課室變咗 SheShe 嘅集中營；喺 Check 校服嘅時候，會有啲曳曳豬著咗啲唔啱規格嘅底衫返學，呢個時候就係 A4 紙出動嘅時候，只見啲唔跟校規嘅人轉身搵張 A4 紙入背脊，掂晒！就算俾人見到都耐你唔何。呢啲咁瘋狂嘅事，相信除咗女校之外，你都好難會見到。

唉，講咁多都係因為掛著以前嘅青蔥歲月啫，青春啊！

